

## 聲情集

### 詠白水晶

光輝何瑩瑩，山中萬載生。垂露滋其質，嚴霜煉其形。玉骨紛日麗，冰心斂月明。守身終不語，無色獨自清。持以長相思，當戶夜窈冥。願使如我意，贈遺表深情。

### 畢典後贈學妹《唐詩》寄語

昔時常自注，今以答卿恩。落筆多藏意，翻紙尚餘溫。永夜懷思際，為我續拙論。辭中兩相和，掩卷更難分。恍然語已多，歧路正黃昏。古詩千秋誦，此意萬代存。蜀鵲血點點，湘竹淚紛紛。努力共學詩，相敘舊校園。

### 返高中校園

昔別雙雙淚滿巾，重來何處覓佳人？輕依傘下花迎雨，獨立樓前葉打身。莫信少年滄海誓，又添無賴素箋塵。當時一句長相憶，使我到今相憶頻。

### 艣舻龍山寺

信徒輕袖染沉香，燕脊低天瑞鳥翔。世事誰將解籤示，浮名自厭問神堂。穿窗麗日移枝影，入院清風弄水塘。雅會吟哦人不見，空餘古寺在周行。

### 筵上贈大陸友人

紅羅漢服塔前多，十里香街千客過。水湧龍飛逐銀浦，月明燈滿漾清波。舊朝寥落城為土，此地尋常人放歌。應惜華筵今夜好，共將詩酒卻干戈。大雁塔前廣場有水舞、花燈，謂「水湧」、「龍飛」。

### 別西安

北野長浮渭水清，南山遠置白雲橫。風催落木單車疾，霧鎖離愁大雁鳴。把酒贈詩臺陸友，乘鵬回首漢唐京。扶搖萬里新科技，重聚明年雙翼輕。

### 迎中文系新生

南風催畢業，回首不須哀。遠望多游子，相逢皆俊才。初衷憑句守，逸興把心開。筆硯詩詞酒，廬中待爾來。

### 同游野柳言別

八月秋陽照海流，飛沙欲斷女王頭。分明玉履終須沒，重疊燭臺難自留。渺渺白雲生遠岫，離離碧草點滄洲。本來凡物多遷化，聚散有時君莫愁。「女王頭」、「仙女鞋」、「燭臺石」皆野柳奇石名。

### 開學病中感賦

窗前庭院入春多，床上經時與病磨。既見深苔滿階積，徒知故友對尊歌。  
影孤長是銷寒骨，雨久不堪旋逝波。試把詩書調苦藥，良宵燈下治沉痾。

### 學書

竹管羊毫架小峰，幽房几榻坐如鐘。名家骨氣傳千歲，騷客詩書本一宗。  
筆陣案頭馳寶馬，風流紙上舞蛟龍。鵝池日日臨碑帖，水墨騰飛入九重。

### 四號公園憶往

祖父當年攜手處，斜陽日日照歸途。憐孫已倦勞肩負，移步時難買杖扶。  
故里還來言志遠，前門別後恐形孤。風中坐想鞦韆上，推動如今有力無？

### 臺大午後即事

閑吟獨步正青春，醉月湖邊柳色新。體沐輕風臥溫草，光搖疏影見微塵。  
蝶團成舞迎佳客，花片無心落滿身。此地明朝恐難覓，只因終似武陵人。

### 傷緬甸

相識緬甸同學，感其身世而作。

路上丘墟氣冷淒，連峰壓水瘴雲低。亂時言別過關去，震後無從對瓦啼。  
蓬轉年華春又盡，星移人事夢長迷。域中多少黃金塔，不見如來佑庶黎。

### 登樓感時事

年少貪高愛奇景，危欄易折莫登臨。前人泣血將天染，孤艇逢礁向海沉。  
名利不存身見困，親交遠去淚難禁。青囊閨樂成遺事，夜雨春風動悔心？  
「青囊」指醫生。

### 蝶戀花夜與伊人傳訊息

訊息收時傳一笑。屏幕無聲，只有微光照。兒女多情話偕老。蕭郎莫負芳心巧。  
晚安今夜誰先道？伏枕關機，別語終須悄。記取樓前約初曉。無眠卻怪秋風擾。

詞牌（欽譜沈會宗格）：

中仄平平仄仄（韻）。中仄平平，中仄平平仄（韻）。中仄平平仄仄仄（韻）。  
中平中仄平平仄（韻）。中平中仄平平仄（韻）。中仄平平，仄仄平平仄（韻）。  
中仄中平中平仄（韻）。中平中仄平平仄（韻）。